



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola XXXVI. Gregorii Papae I. Ad Chrysanthvm Episcopvm Spoletanvm.
De monachis ab eo non defensis.

urn:nbn:de:hbz:466:1-15221

EPISTOLA XXXVI.
GREGORII PAPÆ I.
AD CHRYSANTHVM EPISCOPVM SPOLETANVM.

De monachis ab eo non defensis.

Gregorius Chrysantho episcopo Spoletano.

CVM sit proprium disciplinæ ab illicitis prohibere, & excessus culpas salubriter refecare, studiosè eius seruanda censura est. Nam si negligitur, cuncta in confusione deueniunt, dum alter destruit quidquid ea custodiendo alter ædificat. Valentinus itaque presbyter questus est nobis, quia si monachus monasterii ipsius exigente culpa fuerit communione priuatus, ad loca vestra se conferat, & communionē sine aliqua reservatione percipiat. Quod si ita se res habet, quoniam non solum regularis ordo dissoluitur, sed etiam perditionis ex hoc materia ministratur, qui sub vobis sunt presbyteris districte ac sollicitius interdicare vos necesse est, vt hoc facere de cetero non præsumant. Sed si forte iniuste se excommunicatum quis queritur, fraternitas vestra subtili indagatione cognoscat; & ita causam cognita veritate disponat, vt nec iniustitia diu infontis afflictione præualeat, nec disciplinæ vigor aut frangi, aut indiscreta valeat præsumptione dissolui. Et quia pariter superscriptus presbyter nobis questus est, diaconum quemdam duo iuris sui sub hac conditione manumississe mancipia, vt monachi fieri, & in eodem monasterio debuissent, vbi ipse fuerat, permanere; adiiciens vt si quis contrafacere præsumpsisset, iugo iterum seruitutis per omnia subderetur, atque vnum ex eis hanc omnino conditionem despexisse, & monasterium temerario ausu deseruisse, atque se inter clericos sociasse. Fraternitas igitur vestra & hoc subtili indagatione discutiatur, & si ita repperit, sic sacerdotali se zelo hac in re decenter exhibeat, vt nec illi monasterium deferendi facultas sit, & manumittentis voluntas nihilo minus conseruata aliqua præteriri excusatione non valeat.